

佛说持句神咒经 1 卷

No. 1351 [Nos. 1352-1355]

佛说持句神咒经

吴月支优婆塞支谦译

闻如是。一时佛在舍卫国祇树给孤独园。与大比丘众千二百五十人菩萨万人。尔时从是佛土过亿百千佛国。有世界名无量华。其佛号邓尊王如来无所著至真等正觉。今现在说法。彼佛遣二菩萨。一名无量光明二名大光明。时二菩萨来至释迦文佛所。稽首佛足却住一面。前白佛言。唯然世尊从是佛土过亿百千佛国。有世界名无量华。其佛号邓尊王如来。遣我等来。世尊如常不其众安隐无他耶。天龙鬼神饿鬼女鬼鸠桓。若人非人虎狼毒兽。得无烧乱人民。用是故佛遣是持句咒来。哀念众生令安。吉善名闻威神得力。如是。

阇梨摩诃 阇梨罗尼 优佉目佉 沙波提 摩诃沙波提

佛告阿难。受是持句咒执持诵说。佛世难值。持句咒亦为难遇。善男子善女人。受是持句咒。讽诵读识七世宿命。受持者一切浮陀鬼神若人非人。不得烧近。毒蛇不敢螫。毒药自然除。刀亦不能伤。王亦不能害。梵亦不瞋之。是持句咒。七十七亿佛所说。犯是咒者当获重罪。复有菩萨弥勒等八十人。告贤者阿难。我亦当说持句咒。哀念众生令安。吉善名闻威神得力。如是。

阿知和知 咤佉罗罗 里弥喜利 弥利提卢 留弥勒

佛告阿难。受是持句咒执持诵说。佛世难值。持句咒讽诵读识。十四世宿命。受持者一切浮陀鬼神。若人非人不得烧近。毒蛇不敢螫。毒药自然除。刀亦不能伤。王亦不敢害。梵亦不瞋之。是持句咒八十四亿佛所说。谤是咒者当获重罪。

佛告阿难。我亦当说持句咒。哀念众生令安。吉善名闻威神得力。如是。

阿知和知 那知鳩那知 提梨 沙罗波提 阿那波提 波那提 波那迦和尼摩诃迦和尼

佛告阿难。受是持句呪执持诵说。佛世难值。持句呪亦为难遇。善男子善女人。受是持句呪讽诵读。识无数世宿命。受持者一切浮陀鬼神。若人非人不敢烧近。毒蛇不敢螫。毒药自然除。刀亦不敢伤。王亦不敢害。梵亦不瞋之。是持句呪无数亿佛所说。犯是呪者当获重罪。佛告阿难。是持句呪。行道中当念之。若至县官若行贼中。若盗道若毒若刀刃中。若人非人中当念之。是持句呪于枯树令生叶华实。何况为人结缕也。当使吉百病消除。自然安隐辟除凶害。南无佛令呪皆得从愿。佛说经已皆大欢喜。

佛说持句神呪经

【经文信息】大正藏第 21 册 No. 1351 佛说持句神呪经

【版本记录】CBETA 电子佛典 Rev. 1.10 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，北美某大德提供

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】
